

31 July 2025

समे .18:15 Hrs

<><><><><><>

Headlines

- संसद दे बरसांती आहले इजलास दे अज्ज नौमें ध्याड़े लोकसभा ते राज्यसभा दौनें सदनं दी कार्यवाही गी अज्ज दिन भरै लेई स्थगित करी दित्ता गेआ।
- लेफ्टिनेंट गवर्नर मनोज सिन्हा होरें इस ब'रे दी श्री अमरनाथ जी दी जात्तरा दरान श्रद्धालुएं दी गिनतरी 4 लक्ख दे आंकड़े गी पार करने दे मद्देनजर जाततरा कन्नै जुड़े दे सब्भनें सरबंधत धड़ें दा आभार जताया ऐ।
- श्री अमरनाथ जी दी जात्तरा बालटाल आहले रस्तेया फी शुरू, जिस्सलै के पहलगाम आहले रस्तेआ जात्तरा अजें बी रोकी गेदी ऐ।
- मुख्मन्त्री उमर अब्दुल्ला होरें गुजरात दे सैलसफा मंत्री मुल्लूभाई भेरा हुंदे कन्नै अज्ज अहमदाबाद च जात्तरा ते सैलसफा मतल्लक मेले दा उद्घाटन कीता।
- मुख्म सचिव अटल डुल्लू होरें राश्ट्रव्यापी 'युवा कनेक्ट प्रोग्राम' लेई जम्मू-कश्मीर दिएं यूनिवर्सिटिएं आसेआ कीती जा'रदी तैयारिएं दा जायजा लैता।

<><><><><><>

Parl-Adjourned

संसद दे दौनें सदनं दी कार्यवाही बिहार च मतदाता सूचिं दी विशेष नजरसानी आहले मामले पर विपक्षी पार्टिं दे शोर-शराबे करी बार-बार स्थगित करनी पेई। लोकसभा दी कार्यवाही 2 बारी ते राज्यसभा दी कार्यवाही त्रै बारी स्थगित कीती गेई। लोकसभा दी कार्यवाही जिस्सलै स्थगन मगरा 4 बजे परतिंए शुरू होई तां परतिंए शोर-शराबा शुरू होई गेआ जेदे बाद सदन दी कार्यवाही गी दिन भरै लेई स्थगित करी दित्ता गेआ। इयै नेहा शोर-शराबा राज्यसभा च बी दिक्खने गी लब्बा। कार्यवाही गी साड्डे 4 बजे लेई स्थगित कीता गेआ जिस्सलै कार्यवाही परतिंए शुरू होई तां कम्मकाज गी अगगे चलाने दी कोश्ट कीती गेई पर शोर-शराबा जारी रेआ ते सदन गी दिन भरै लेई स्थगित करी दित्ता गेआ।

<><><><><><>

LG-Amarnath-4 lack Yatra

उपराज्यपाल मनोज सिन्हा होरें श्री अमरनाथ जी दी गुफा च मत्था टेकने आहले श्रद्धालुएं दा आंकड़ा 4 लक्ख गी पार करी जाने पर खुशी जाहिर कीती ते इस जात्तरा दे इंतजामें कन्नै जुड़े दे सारे सरबंधी धड़ें गी मुबारकबाद

दित्ती। उपराज्यपाल होरें सोशल मीडिया दी इक पोस्ट च लिखेआ जे बाबा अमरनाथ होरें असमभव गी संभव करी दित्ता ऐ। उपराज्यपाल होरें आखेआ जे भगवान शिव नै करिश्मा करिए दस्सेआ। सब्बनें सरबंधी धड़ें गी जेड़े बी इस जात्तरा दे इंतजामें गी दिक्ख'रदे न, दा धन्नवाद कीता जिनें श्रद्धालुएं लेई इसी खास अनुभव बनाया। इस जात्तरा लेई दुनिया ते मुल्लख भरै थमां श्रद्धालु आए। एहू सब्ब भारत दी एकता, अखंडता ते चुनौतिएं थमां बाहर औने दे धेइये दा प्रतीक ऐ।

<><><><><><>

Amaranth-Yatri Resumes

अमरनाथ जी दी जात्तरा बालटाल आहले रस्ते राएं बहाल होई गई ऐ। इस जात्तरा गी भारी बरखा करी स्थगित कीता गेआ हा। उआं पहलगाम आहले रस्ते राएं जात्तरा अजें बी बंद ऐ की जे रस्ते दी मरम्मत आहला कम्म जारी ऐ। बुधवारें एहू जात्तरा दौनें रस्ते राएं स्थगित कीती गई ही की जे घाटी च भारी बरखा होई ही। महाराष्ट्र थमां श्री अमरनाथ जी दी जात्तरा पर आए दे श्रद्धालु विवेक नै अपने अनुभव सांझा कीते ते सुरक्षा, साफ-सफाई ते लंगर सुविधा दी सिफत कीती। उनें आखेआ।

<><><><><><>

CM Travel Fair

मुख्यमंत्री उमर अब्दुल्ला ते गुजरात दे सैलसफा मंत्री मुल्लेभाई भेरा होरें अहमदाबाद च ट्रैवल एंड टूरिजम फेयर दा उद्घाटन कीता। एहूदे च जम्मू-कश्मीर दी समृद्ध सांस्कृतिक विरासत गी दर्शाया जा'रदा ऐ। इस मौके पर मुख्यमंत्री हुंदे सलाहकार नासिर असलम वाणी, विधायक पहलगाम ते विधायक गुलमर्ग बी उन्दे कन्नै मौजूद हे। इस मौके पर बोलदे होई उमर अब्दुल्ला होरें ट्रैवलर्स गी जम्मू-कश्मीर औने दा साद्दा दित्ता ते उनेंगी उत्थुआं दी सुंदरता, संस्कृति ते मेमानबाजी गी अनुभव करने लेई गलाया।

<><><><><><>

Padam-Awards

पद्म पुरस्कारें लेई नामांकन ते सफारशें दी खीरी तरीक 15 अगस्त तोहड़ी बधाई दित्ती गई ऐ। पुरस्कारें लेई नामांकन छड़े राश्ट्री पुरस्कार पोर्टल पर ऑनलाइन हासल कीते जाडन। ब'रे 2026 लेई पद्म पुरस्कारें दा ऐलान गणतंत्र दिवस, 2026 दे मौके उप्पर कीता जाहगा। एकड़े पुरस्कारें च - पद्म विभूषण, पद्म भूषण ते पद्म श्री पुरस्कार शामिल न। एहू पुरस्कार विशिष्ट कम्में गी मान्यता प्रदान करने लेई सब्बनें खेत्तरें ते विशें च विशिष्ट ते असाधारण उपलब्धियें सने सेवा लेई दित्ता ज'दा ऐ।

<><><><><><>

Subordinate Legislation Comm

जम्मू-कश्मीर विधानसभा दी मतैहत विधाई कमेटी नै कुशल ते त्रुटी-रैहत सेवां यकीनी बनाने दी जरूरतै पर जोर दि'दे होई आखेआ ऐ जे मैहकमा माल दि'आं सेवां-सुविधां पूरी चाल्ली पारदर्शी ते असरदार ढंगै सिर उपलब्ध

होना बड़ा जरूरी ऐ तांजे हर आम आदमी बी इ'नेंगी विजन कुसै दिक्कत-परेशानी दे हासल करी सकै। कल विधानसभा परिसर श्रीनगर च मैहकमा माल आसेआ तैयार कीते गेदे नियमें-कायदें दी जांच ते नजरसानी गितै लोआई गेदी इक बैठका च एह गल्ल आखी गई जेहदी अध्यक्षता कमेटी दे प्रधान हसनैन मसूदी होरें कीती। इस दरान उ'नें बरोबरी ते न्याऽ गी यकीनी बनाने लेई जकीनें सरबंधी नियमें दी जानकारी ते अमलावरी दे महत्वै गी बी उजागर कीता।

<><><><><><>

CS-VBYCP

मुख्व सचिव अटल डुल्लु होरें प्रधानमंत्री हुं'दे मार्गदर्शन हेठ रम्भी जा'रदी मते महत्वै आहली पैहलकदमी - विकसित भारत युवा कनेक्ट प्रोग्राम लेई तैयारिएं दा अज्ज जायजा लैता। राश्ट्री सतह दी इस पैहलकदमी गी युवाएं सरबंधी अंतराश्ट्री दिवस दे मौके उप्पर औंदी 12 अगस्त गी रम्भेआ जाहगा। इस कार्यक्रम दी अगुवाई भारत सरकार दे युवा मामलें ते खेडुं सरबंधी मंत्रालय आसेआ कीती जा'रदी ऐ ते एहदा मकसद 2047 तोहडी इक विकसित भारत दे निर्माण आहली भारत दी विकास जात्तरा च युवाएं गी महत्वपूर्ण भागीदार दे तौर उप्पर सशक्त बनाना ऐ। मुख्व सचिव होरें औंदी 12 अगस्त गी लोआए जाने आहले राश्ट्री सतह दे मुख्व समारोह ते ओहदे कोला पैहले करोआई जाने आहली गतिविधिएं लेई तैयारिएं बारै बक्ख-बक्ख युनिवर्सिटिएं दे वाईस-चांसलरें थमां जानकारी हासल कीती।

<><><><><><>

NEET-PG-2025

मेडिकल साईंस मतल्लक म्तेहानें आहले राश्ट्री बोर्ड- एन.बी.ई.एम.एस. नै नीट पीजी-2025 दे म्तेहान लेई दाखला कार्ड अधिकारिक तौर पर जारी करी दित्ते ना। इस म्तेहान लेई अपने नांऽ दर्ज करोआने आहले मेदवार, बोर्ड दी अधिकारिक वैबसाईट दइमण्मकनण्पद पर जाइयै अपने दाखला कार्ड डाउनलोड करी सकदे ना। नीट पीजी 2025 दा म्तेहान औंदी 3 अगस्त गी लैता जाना मुकरर कीता गेदा ऐ। मेदवारें गी लोडचदा ऐ जे ओह अधिकारिक वैबसाईट पर जाइयै 'एन्ट्रेंस एग्जैमिनेशन' आहली सैक्शन तैहत नीट-पीजी 2025 पर जाइयै अपने लॉग-इन मतल्लक ब्यौरे दर्ज करियै दाखला कार्ड डाउनलोड करी सकदे ना।

<><><><><><>

Capex-Plan

रियासी जिला विकास कौंसल दी बैठक जिला विकास कौंसल दे चेयरपर्सन सराफ सिंह नाग हुंदी अध्यक्षता च डी.सी दफ्तर परिसर च लगगी। इस दरान जिला कैपेक्स योजना 2025-26 तैहत विकास योजना गी खीरी रूप दित्ता गेआ। बैठक च डीडीसी वाइस चेयरपर्सन सजरा कादिर, डीडीसी मिम्बर ते जिले दे होर दुए अधिकारी मौजूद हे। रियासी दे मुख्व योजना अधिकारी होरें व्यापक पावर प्वाइंट प्रेजेंटेशन दित्ती। ए.डी.डी.सी रियासी

सुखदेव सिंह समयाल होंरें डी.डी.सी चेयरपर्सन होंरें गी चला'रदे ते प्रस्तावित विकास गतिविधिएं दी जानकारी दिती। इस मौके पर बोलदे होई जिला विकास कौंसल दे अध्यक्ष सराफ सिंह नाग होंरें आखेआ।

<><><><><><>

DC-Kishtwar-JKCIP

किश्तवाड़ दे डिप्टी कमिशनर पंकज कुमार शर्मा होंरें अज्ज इक बैठक लाइयै जिले च राई-बाई ते होंरनें सरबंधत खेत्तरें च मुकाबलेबाजी दी समर्थ बधाने सरबंधी परियोजना - जेके.सीआईपी तैहत हासल प्रगति दा जायजा लैता। इस मौके पर डिप्टी कमिशनर होंरें राई-बाई मैहकमे दे फील्ड सतह दे अधिकारिएं गी निर्देश दिता जे ओहू जेके.सीआईपी परियोजना दे बक्ख-बक्ख हिस्सें जि'आं केसर, औषधीय ते खशबूदार बूहटे, पानी दे प्रबंधन, सुरक्षित ढंगै सिर रड़, खुबें दी काशत ते मखीर दी पैदावार जनेय खेत्तरें तैहत हासल होने आहले आवेदनें दी गिनतरी च बाह्ने लेई जतन करन। इस मौके पर इब्बी जानकारी दिती गेई जे अजे तोहड़ी कुल 9 आवेदन हासल होई चुके दे न।

<><><><><><>

Sheep Husbandry

रामबन जिले च संगठित भिडु पालन विकास योजना तैहत खरा मता कम्म होआ'रदा ऐ। सरकार आसेआ शुरु कीती गेदी इस पैहल कन्नै भिडु पालके गी मता लाहू ते सुविधा हासल होआ करदी ऐ। एहदे'नै नां छड़ा भिडु ते बकरी पालन गी बढ़ावा थहोआ'रदा ऐ सगुआं इस कम्मै कन्नै जुडे दे लोके गी आर्थिक तौरा पर बी फायदा पुज्जा करदा ऐ। पशु पालन मैहकमा रामबन आसेआ लागू कीती जा'रदी स्कीम तैहत भिडु ते बकरी पालके गी अपनी इकाई खडेरने, भिडुं मुनने लेई थाह तैयार करने ते होंरनें कम्मं लेई पूरी जानकारी ते माली मदाद बी थहोआ करदी ऐ। स्कीम दा मकसद भिडु ते बकरी पालन दे कम्मं च मते थवां मते लोके गी शामिल करियै उंदी औंदन गी बधाना ऐ। एहदे अलावा इस योजना तैहत चेचा ध्यान उन्न ते मटन दी पैदावार ते म्यार बधाने पर बी दिता जा'रदा ऐ। इस सरबंधे च होंर जानकारी दिंदे होई भिडु पालन सरबंधी मैहकमे दे जिला अधिकारी डाक्टर शब्बीर अहमद खान होंरें आखेआ

<><><><><><>

Aakansha-Haat

जिला प्रशासन रामबन आसेआ औंदी 2 अगस्त गी दपैह्ली 2 बजे थमां रामबन दे टी-चौक आहले सामुदायिक हॉल च 7एं दिनें दे आकान्शा हॉट मेले दा आयोजन कीता जाहग। इस मेले दरान बक्ख-बक्ख मैहकमे आसेआ अपने पंडाल, नमैशां ते मुकामी उत्पादे दी बिक्री वगैरा दा सरिस्ता कीता जाहग। एहदे अलावा मौके पर गै लोके गी बक्ख-बक्ख सार्वजनिक सेवाएं दी दस्तयाबी बी जकीनी बनाई जाहग। जिला प्रशासन नै सब्भनें लोके गी इस कार्यक्रम च हिस्सा लैने दा साहा दिता ऐ कीजे मते लोके दी शमूलियत नां छड़ा इस मेले गी कामयाब बनाग सगुआं एहदे राहें जिले च लोक कल्याण ते समग्र विकास दी दिशा च बी जोगदान थहोग।

<><><><><><>